

The Digital *Viridarium consolationis* Project

Pars 4: De aliis virtutibus Caput 5: De amore Dei (19)

Idem (Augustinus):

Si filii huius seculi noctis et tenebrarum,
tanto desiderio tantoque studio diligunt,
et querunt perituras divitias et fugitivos honores,
quantum nos servi tui diligere debemus te,
per quem facti et redempti sumus.
Si enim homo hominem tanta diligit dilectione,
ut alter alterum vix patitur abesse,
si sponsa sponso tanto conglutinatur amore,
ut prae magnitudine amoris, nulla perfrui valeat,
absentiam sui cari, non sine magno merore ferens.
Qua ergo dilectione, quo studio,
quo fervore anima quam desponsasti tibi spe et fide,
in misericordia et miserationibus,
debet diligere te deum verum et pulcherrimum sponsum,
qui nos sic amasti, qui pro nobis tanta et talia fecisti?
Quamquam autem haec infima suas habeant dilectiones,
et delectationes suosque amores,
non tamen tali modo delectantur sicut tu, deus noster.

Clementissime Domine, et aequissime iudex,
cui omne iudicium dedit Pater, sapientissimo aequitatis tuae
decernis imperio hoc rectum et justum esse,
ut filii huius saeculi, noctis scilicet et tenebrarum,
praestantiori desiderio, virtute atque studio diligant
et quaerant perituras divitias et fugitivos honores,
quam nos servi tui diligamus te, Deus noster,
per quem facti et redempti sumus.
Si enim homo hominem tanta diligit dilectione,
ut alter alterum vix patitur abesse;
si sponsa sponso tanto mentis conglutinatur ardore,
ut prae magnitudine amoris nulla perfrui valeat requie,
chari sui absentiam non sine magno moerore ferens:
qua ergo dilectione, quo studio,
quo fervore anima quam desponsasti tibi in justitia et fide,
in misericordia et miserationibus,
debet diligere te Deum verum et pulcherrimum sponsum,
qui nos sic amasti et salvasti, qui pro nobis tanta et talia fecisti?
Quamquam autem haec infima habeant suas delectationes,
suosque amores;
non tamen tali modo delectant, sicut tu, Deus noster.

Pseudo-Augustinus, *Meditationum liber unus*, 35 (PL 40, col.929-30).